

昭

代

典

則

昭代典則卷十六

賜進士太子少保刑部尚書晉江黃光昇編纂

吳郡陸翀之訂正

書林周曰校刊行

恭仁康定景皇帝

庚午景泰元年春正月上皇在迤北

上皇書至索大臣來迎命公卿集議廷臣因奏請遣官

使北賀節進冬衣上謂必能識太上皇帝者始可行群

臣遂懼謝罪繳納原奏事遂寢

內侍單增有罪下獄

時增恃寵驕縱大臣有候其生日結約武弁持賄拜賀

其家。如往年之事。王振者。都給事中。林聰。率六科十三道上疏。暴其罪惡。且曰。復起群邪。趨媚之風。大開小人奔競之路。乞急治。不然。必蹈覆轍。上命錦衣衛捕治之。後雖獲釋。然不敢復肆矣。

內閣彭時憂去。○命副都御史軒輶鎮守浙江。兼理鹽課。○虜入大同塞。總兵郭登擊却之。

虜犯京。既退。登上疏言。虜人雖回。離邊不遠。傳報有云。黃河已凍。且向延綏。青草復生。再侵京闕。事雖未信。情亦可推。乞開誠待下。側席求賢。擴天理。克人欲。以成聖學之功。親君子。遠小人。以收天下之望。十二月。又傳虜欲犯京師。登以京兵新選。不可輕戰。又疏曰。今日之計。

可以養銳。不可浪戰。可以用智。不可鬪勇。此謂知彼知已。可守則守。其涑水易州真定保定一帶皆堅壁清野。京兵分據犄角安營。以逸待勞。以主待客。勿求倖倖。務在萬全。此謂不戰而屈人兵。善之善者也。是年正月賊入大同境。登率兵躡之行七十里。至水頭。日暮休兵。夜二鼓有報云。東西沙窩賊營十二。皆自朔州掠回。登召諸將問計。或言我寡莫若全軍而還。登曰。我軍去城百里。一還避人。馬疲倦。賊以鐵騎來追。難以自全。卽按劍起曰。敢言退者斬。徑薄賊營。天漸明。賊以數百騎迎戰。登奮勇先登。諸軍繼進。呼聲震山谷。登射中二人。手刀一人。遂大破其衆。追奔四十餘里。至栲栳山。斬首虜二

百餘奪還人馬器械萬計進封定襄伯食祿千一百石  
與世券是役也登以八百騎破虜數千爲一時戰功第二  
令天下生員納粟上馬許入監上選事例與歲貢同○山  
西行都司天城衛吏賈斌上疏進忠義集發回原衛

山西行都司天城衛令史賈斌上疏言漢桓帝權歸宦  
豎唐文宗受制家奴宋徽欽聽用閹寺皆馴致敗亡太  
上皇失位去國亦由此輩今皇上肇登寶位宜法高皇  
帝以爲治事無大小必悉經宸斷閹人專備灑掃不許  
竊柄凡阿諛者必斥之端本澄源謹終如始則天下一  
新矣臣於歷代直諫盡忠守節之士與恃寵宦官撮其  
尤者錄成四卷名曰忠義集伏乞刊布臣僚必能觀感

以興起其忠義之誠而宦者亦不得縱其姦宄之私矣  
事下禮部尚書胡濙覆奏斌言雖有理然章皇帝御製  
臣鑑已行頒給足爲勸戒所編不必刊布且言斌擅自  
雜役發回原衛斌後莫究所終

閏正月京師烈風晝晦○鎮朔大將軍石亨都督范廣率  
兵出大同宣府尋召還○二月進苗衷兵部尚書兼翰林  
學士○贈前侍講劉球爲翰林學士謚忠愍○以兵部右  
侍郎俞綱直文淵閣尋出理部事○以孫原貞爲兵部右  
侍郎參贊浙江軍務○吏部辦事吏徐鎮請禁大臣潛遣  
家歸不報○三月虜奉上皇至大同分道入寇

是月虜入薺麥川偏頭關都督杜忠擊敗之虜又入萬

全入寧夏至慶陽復奉車駕至大同諸虜大掠蔚朔分  
寇宣府諸城時獲虜謀言田達千道也先與賽罕王大  
同王答兒不花王鐵哥不花王鐵哥平章脫脫不花王  
分道入寇虜意欲上皇不忍諸邊受害促賂議和迎駕  
也。

夏四月宣府遊擊楊俊擒喜寧檻送京師伏誅

楊洪庶子俊充遊擊將軍時出宣府經略獨石諸城是  
月二十二日上皇以久無使臣往來而喜寧又潛懷二  
意數教也先擾邊乃令袁彬至也先處說爺爺有旨要  
差總旗高盛太監喜寧達于哪哈出回京也先依聽上  
皇又密書喜寧謀叛情跡令盛到宣府與總兵官以討

擒之。及至野狐嶺，高臺與喜寧飲城下，密約城上於進  
湯時，卽發短鎗。少頃鎗發，連衆走散。繫抱喜寧，滾下濠  
中，遂擒入城。哪哈出回營報知。上皇喜曰：「這厮使兩下  
動干戈害人，如今掣了，邊上方得寧靜。」我南靖也可期  
了。楊俊送喜寧至京，誅之，以功陞都督。○俊上言也先  
往時酋長尚在，東西諸番未附。今旣弒脫脫不花，并其  
衆東自女直，兀良哈野人西至蒙古，赤斤哈密皆受約  
束，包藏禍心，待時而動。又聞其妻掣輜重在哈刺莽來  
去宣府，纔數百里，健人壯馬屯沙窩，去邊尤近。今大同  
宣府懷來遼東山海永平寧夏延綏甘涼莊浪等處宿  
兵不下數十萬，臣愚以爲險阻之處，量留守禦，其餘壯



勇各選老成謀略將官統率迤西悉赴代州迤東悉附永平結營操練更選京營騎兵甲令股肱大臣統率至大同宣府會合所在兵列營堅守爲正兵其永平營赴獨石代州營兵赴偏頭關一帶按伏爲奇兵部署既定或拘絕虜使以激其怒或檄數叛逆以正其罪彼必來侵我正兵堅壁清野坐觀其變密遣奇兵日夜倍道擣其巢穴使彼前不敢進後不能顧必擒其妻孥獲其輜重彼或察知我謀急還相救我乘其奔潰奇兵夾攻立致摧敗此實成功取勝之機抑臣又聞三軍之害猶豫最甚昔在有宋澶淵之役若從寇準之議必無靖康之悔今若間以群疑失今不治臣恐他日之患猶有甚于

今日者願陛下重念天下者祖宗之天下人民者祖宗之人民縱欲息兵保民暫安一時寧不思祖宗創業守成之艱乎文武諸臣何面目忍恥偷生縱此虜騎悍乎臣一家父子兄弟受恩實深馬革裹尸固其分也事下總督兵及部營中諸將校議于少保言賊虜也先達天背德彼之罪惡已盈我之警恥宜雪楊俊此疏發憤殉國但興兵舉事係社稷安危卽如俊所言萬一我軍出境賊與我牽制別分大羊由間道乘虛四散剽掠是自散守備計非萬全國家之害非止北虜東南寇盜未除河南流民又聚豈可輕內重外更不思患預防夷狄之性利於疾速不能持久去來如風雨聚散如蜂蟻得利則

鴟張失勢則鼠遁乃其態若欲糾兵涉遠出徼倖之謀  
掠奸凶之虜將卒不相知號令不相統臣愚未見其可  
上從謙議。

都督董興破廣賊獲黃蕭養誅之封董興爲海寧伯

初楊信民爲廣東叅議有惠政恩信素孚於民及爲都  
御史巡撫至廣州民爭歸之信民發粟賑濟民益喜賊  
黨日散旣而信民卒興等帥兵至時天文生馮軾隨行  
至中道夜半鷄鳴興問之曰此何祥也對曰鷄不以時  
鳴由賞罰不明願公嚴軍令經清遠峽有白魚入舟中  
軾曰昔武王伐紂有此徵此逆賊授首之兆也時蕭養  
聚船河南千餘艘勢甚張衆欲請益兵軾曰兵貴神速

若復請兵則緩不及事。以所徵兩廣江西狼兵取勝。猶摧朽耳。興從之。三月初旬夜有大星墜于河南岸。軾以所占告曰。四旬內破賊必矣。至是興師。官軍至大洲頭。與賊遇。果大破之。蕭養中流矢被擒。伏誅。餘黨悉平。封興寧海伯。

吏部侍郎何文淵請罷貴州布政司。不許。○大同叅將許貴請遣使赴虜議和。不許。

許貴言虜請和。乞答使緩兵下。兵部議尚書于謙知上意不欲迎駕。議曰。襄遣都指揮牽鐸指揮岳謙往使財賂方入穹廬。虜騎已至關口。繼遣少卿王榮通政王復又往。不得要領而還。今日之事。理與勢皆不可和。何者。

中國與寇虜有不其戴天之讐。和則背君父而違大義。此理不可和也。醜虜貪而多詐。萬一和議既行。而彼有無厭之求。非分之理。從之則不可。違之則速變。此勢不可和也。移文詰責許貴。○是時上皇蒙塵在虜。宜察虜和果實。且與之和。迎還車駕。徐圖復讐可也。夫和固爲背違君父。而慮虜有無厭之求。不和則兵終不可罷。而君父終不可回。豈臣子忠義之道乎。

致仕國子監祭酒李時勉卒。○虜入鴈門關。

時遣五將率兵三萬分屯真定保定易州涿州通州。以寧遠伯任禮爲總兵官。率精兵五千。巡守各城。禮辭老。以都督同知劉安代之。

五月虜入河曲圍代州○虜酋阿剌遣使貢馬請和不許虜酋阿剌遣人貢馬請和邊臣留之懷來以聞又武大臣請遣太常少卿許彬錦衣都指揮同知馬政譯使情偽彬等言虜果欲議和罷兵且奉還上皇奏乞口陳循等對文華殿諭曰也先背逆天道遮留上皇不共天奈何言和循等頓首請賞虜使且好語諭阿剌緩其詐謀京營邊塞嚴爲防禦上曰善勅阿剌曰我朝與爾瓦剌和好也先違天犯順朕兄太上皇帝興師問罪也先又輒遮留毒我生靈殘我邊徼朕承嗣大統宗室臣民咸請興兵討罪復讐朕念也先屢請送大駕回京以故遣人賜書授賞乃也先譎詐反覆今阿剌使至亦奏

云云朕欲從爾。但聞也先尚聚衆塞上。意在脇挾義。不可從。卽阿剌必欲和好。待瓦剌諸部落北歸。議和未晚。不然朕不惜戰也。先凶傲不悛悔禍。恐無及。使回朕加恩賚。厚賜阿剌答來意。

浙江按察副使陶成禦賊戰歿

處州賊陶得二寇武義縣。浙江按察副使陶成禦之戰歿。得二先已招降。旣而復叛。率衆來攻武義。無城惟設木柵。賊大至。或勸成稍却以避其鋒。成不可。麾兵與戰。自辰至申。俄而城中火起。蓋賊有潛入城爲內應者。兵遂大潰。成策馬突陣歿。之事聞。贈左叅政。諭祭配享越國公胡大海廟。廕其子魯爲廣東新會縣丞。成廣西鬱

林人初舉鄉試告就遠方授交趾典史以有守有爲累薦至今職

### 立團營

兵部尚書于謙以京師兵馬分隸五軍神機三千諸營雖各有總兵而不相統每遇調遣選摘奏撥號令不同兵將素不相識或至誤事乃議揀選三大營馬步軍一十五萬分爲十營每營各以都督總領常令在營操練以備緊急調用就於三大營提督中揀二人充提督團營總兵官文臣提督卽以兵部尚書

南京禮部尚書王英卒○城固原○六月丙戌虜奉上皇復至大同肆行擄掠○都督楊俊論死尋釋降督府僉事



時遣俊護瓦刺使人出塞。俊挾私怨杖永寧守備都指揮姚貴。且縛貴斬諸裨校。力解得什比還。廷臣劾俊論。以會俊嫡弟嗣侯傑卒。毋請什俊葬。傑得降督府僉事。遂得嗣父洪侯。

秋七月虜酋阿剌遣使請和。以李實爲禮部侍郎。羅綺爲大理少卿。奉勅使虜。

也先屢以議和不諧。復俾其知樞密院阿剌爲書遣其參政完者脫歡等五人赴京請和。禮部議奏奉迎上皇。景帝不允。次日景帝御文華殿。諭大臣言官絕虜吏部尚書王直對。謂上皇在虜。理宜迎復。必乞遣使。勿使有他日之悔。帝不悅曰。朕無意大位。若曹過爲朕疑。今奈

何異議于謙對曰大位已定孰敢他議。抵答使舒邊患耳。帝意始釋曰。從汝從汝言已。卽退。群臣出文華門。太監興安匍匐而呼曰。孰堪使者。有文天祥富弼其人乎。衆未答。王直面赤厲聲曰。是何言。臣皆王臣。惟皇上使敢弗行乎。安語塞入。復時李實任禮科都給事中。帝命興安傳旨。欲遣使虜中。如何對曰。實雖才識不周。適朝廷多事之秋。安敢辭諒亦不辱君命。興安入內復命。遂陞李實禮部右侍郎爲正使。羅綺右少卿爲副使。馬頭陞指揮使爲通事。上御左順門召實等面諭曰。你每去脫脫不花也。先那裡須勤謹辦事。好生說話。不要弱了國勢。上遺書脫脫不花可汗曰。我國家與可汗自祖宗

來和好往來恩意甚厚。往年奸臣專減使臣賞賜。遂失大義。遮留朕兄。今各邊奏報。可汗尚留塞上。殺掠人民。朕欲命將出師往討。念彼此人民。上天赤子。付朕與可汗管攝。可汗殺朕人。朕亦殺可汗人。與自殺之何異。逆天莫大焉。朕不敢恃中國之大。人民之衆。輕於戰鬪。恐逆天也。近得阿剌使奏言。已將各家軍馬。約束回營。是有畏天之意。深合朕心。特遣使齎書幣達可汗。其益體朕意。副天心。勅也。先曰。自爾祖父至爾。我國家待遇甚厚。曩因小隙。連兵將臣弗戒。大駕淹留。昨已遣人重齎金幣。奉迎至三至四。爾不發不報。以故使命不通。此非朝廷之過。乃者縱兵四出。殺掠人民。皆天赤子。欲其嗟

飯着衣長養生息若殘害其生逆天無道天所讐也近  
阿剌來言追還各家兵馬仍議和好是能畏天愛民直  
丈夫矣而近邊時聞劫掠是情與詞異朕固不惜大戰  
但恐害天赤子違天意故特命使臣往諭此意太師其  
念舊恩順上天愛民之意罷兵息戰圖永遠之福又勅  
諭阿剌知院遣可汗及也先阿剌各白金百兩金織文  
綺八一時閣臣及府部諸臣奉承上意只言罷兵講和  
絕不及迎回上皇之意實等遂借虜使完者脫歡等行  
以七月十七日至也先營地名失八禿兒與也先并伊  
婦開讀勅書畢也先曰大明皇帝因何差爾每答曰自  
太師祖父以來至今日朝貢朝廷三十餘年你使臣進

馬往往待以厚禮。遇以厚恩。近因奸臣王振擅權。減少馬價。以致太師動兵。遮留太上皇帝。駕搶掠人民。殺害軍馬。今阿剌知院上合天道下順人心。奏知可汗。稟知太師。特念前和。同差參政完者脫歡。齎文赴京。以求和好。因此差我大臣。齎送賞賜。給與太師。并可汗。阿剌知院以全終始。依舊遣使往來也。先曰。這事只因陳友馬清馬雲。小人上是非。所以動兵。小事做成大事。我實心送大明皇帝到京。你每不差大臣出城迎接。我着張開保姚謙去奏。又將他殺了。因此上又搶了。其鄉涿州一帶人馬。皆曰。太師既是送駕。軍馬不由關入漫山而來。肆意搶掠。不過假名送駕耳。朝廷不能無疑。况又分兵。

各門所殺姚謙張闢保旣爲使臣使達達百餘人各  
張弓矢遇敵亂殺實不知二人爲使臣也先日說的是  
又曰又差盈不花六人進京奏事回又不放回因此  
上又捨了大同寧夏一帶人馬實本曰太師軍馬南侵  
父被害者子爲報仇兄被擄者弟爲報仇人皆樂爲從  
軍今南朝沿邊關口軍馬多者十餘萬少者六七萬極  
少者亦三五萬名爲報君父之仇臣軍士獲一首  
卽得監賞太師雖差使臣若無賞更同行或殺兀良哈  
達子或被守邊軍殺戮以圖監賞又曰復又差李貴我  
着送到大同城裡因何亦不放回實答曰近時夜不收  
報說哨到大同東邊離城八里見有殺灰身屍四五十

人拾得荷包一箇。內有文書一紙。稱是太師差來奏事。人既不知末審虛的。想被守邊軍士殺了。并不見一人。將到朝廷。如叅政完者脫歡等到京奏事。重加賞賜。禮待筵宴。又差我每同來。兩國和好。必資使臣。以通其情。豈肯殺害自絕其路也。先然之。又曰。我差喜寧奏事。何以殺了。實曰。喜寧自幼及長。累受朝廷恩寵。加厚於人。托爲心腹。令賞執金帛。迎取上皇。却又領太師人馬。搶掠京師。復寇寧夏。朝廷已將喜寧明正典刑。凌遲三日。以爲將來不忠之戒也。先喜而言曰。是我亦知道。又曰。大明皇帝與我是仇人。自領軍馬與我廝殺。天的氣候落在我手裡。衆人教我害他。我再三不肯。也是一朝人。

主。我特着知院伯顏帖木兒早晚恭敬。不曾怠慢。你每捉住我。留到今日麼。明日引你去見實答曰。此足見太師仁厚之心也。先曰。你每來的好。我正歡喜。料得你每事務成就了。若不來呵。我每人馬七月十五日人馬到北京也。先把酒曰。路人辛勤。可飲數盃。飲畢出。令平章尚書人等送壯馬一匹。宰之爲下程。十二日差頭目人等。資達達可汗并阿剌知院。勅書賞賜分頭前去。同日差平章人等。引實三十里見上皇。同少卿羅綺指揮馬顯。共進紵絲四疋。粳米魚肉。裸炒燒炙器皿等物。實泣下。行禮畢。唯見校尉袁彬軍餘劉子俊僧人夏繡三人侍左右。上所居者皮帳布幃。席地而坐。牛車一輛。馬一



匹。以爲移營之具。上曰。比先我來。非爲遊獵私已之事。乃爲天下生靈。躬率六軍。征討迤北。不意被留在此。實因陳友王振馬清馬雲所陷也。先實有意送我回京。被喜寧引路。先破紫荊關。擄殺人馬。圍京城。喜寧不肯送回。後至小黃河。也先欲送回。又被喜寧阻住。在乾河。又要送回。喜寧又阻住。喜寧已凌遲了。陳友不要饒他。上問聖母及上安否。實奏曰。安。乃問舊臣。一一道其姓名。甚悉。上曰。我在此一年。因何不差人來迎我。回你每與我將得衣服冠帶靴帽來否。實奏曰。陛下蒙塵。群臣及天下生民如失。考妣但虜中數次走回。有言見陛下者。有言未見陛下。言語不一。又數次差人來迎。俱無回報。

難知有無因此特差臣等來探虛實不曾有衣服帶  
上曰你每回去上覆當今皇帝并內外文武群臣差人  
來迎我回我情愿看守祖宗陵寢或爲百姓也好若不  
來接我也先說令人馬擾邊十年也不休我一身不足  
惜祖宗社稷天下生靈爲重實詢知也先五日送牛一  
隻羊一隻送上爲供所食殊無米菜實奏曰昔陛下錦  
衣玉食觀今衣服惡陋不堪有大米數升欲進上曰飲  
食之類小節與我整理大事實奏曰王振一宦官耳若  
何寵之太過終被傾危國家以致今日蒙塵之禍上曰  
王振無事之時人皆不說今日有事都歸罪於我我亦  
知此人終壞大事不能去之今悔莫及時伯顏帖木兒

適來歷言其故。亦如也。先之詞。上賜酒飯畢。上令至帖木兒營中。烹羊與伊婦把酒勸飲。復回見上。復命。次議大事。實以上昔任用非人。當引咎自責。謙退避位之理。上嘉從之。日暮深有不忍之情。欲留宿。館伴者促歸。不果。乃歸宿也。先營中。送下程羊二隻。十二日也。先宰馬脩酒相待。令十餘人彈琵琶吹胡笳。按拍歌勸酒。曰。你每來時。心裡可怕麼。實荅曰。自古敵國。以禮爲上。欲要講和。必命使臣以通兩國之情。途中遇賊寇。躬冒危險。尚無所怕。今到太師營中。便如一家。何怕之有也。先喜而然之。且曰。有理的。不怕。無理的。怕也。先曰。你每認的上皇。可想他麼。曰。爲臣盡忠。爲子死孝。君父之恩。豈可

忘乎。我每之思上皇。卽太師之思可汗耳。也先曰。然旣是思想。何不取回實。荅曰。朝廷數次差人賫金帛。太師皆不發。今太師旣是肯着我奉迎回。朝廷自有厚禮給賞。不輕也。先曰。大明皇帝勅書內。只說講和。不曾來接駕。大明皇帝留在這裡。又做不得我的皇帝。是一箇閑人。諸事難用。我還你每千載之后。只圖箇好名兒。你每回去奏知。務要差太監一二人。老臣三五人來接。我便差人送去。如今送去呵。輕易了你每皇帝了。十四日實與也先作辭。也先曰。差來接駕的。約至八月初五日。若來遲。着差去兩箇達子。同兩箇漢人。務要初五日先到回報。正使再遲三五日亦可。若不來。軍馬擾邊。莫說我。

每失信。本日往辭上皇。時伯顏在側曰。大人回。可着人早來圖成大事。實曰。皇帝在此。多蒙恭敬。奏知朝廷。給賞慰勞。上皇再三叮嚀迎復之事。袖出書三封。令實賁回曰。你去上福聖母太后。上福當今皇帝也。先非耍土地。非耍歲幣。惟耍蟒龍并織金綵段等物。差人早早賁來。實領命泣下。辭起程。與也先所差右丞把禿偕行。

普化可汗

卽脫脫不花

遣使皮兒馬黑麻入貢請和。○遣右都

御史楊善工部侍郎趙榮使虜

普化可汗遣使請和。文武大臣懼虜譎詐。莫敢往報。右都御史楊善慨然欲往。上從之。人皆危善。善曰。上皇在虜廷。食君祿者。於心何安。此爲臣者。効命之秋也。中書

舍人趙榮亦毅然請往。工部尚書高穀壯榮解金帶贈榮曰：子忠義人也。乃遣善及以榮爲工部右侍郎，與都指揮王息正、千戶湯胤勳偕虜使皮兒馬黑麻使虜。禮部尚書胡濙言：上皇蒙塵已久，宜卽附善等進上服食。不報。

李實羅綺以虜使把禿朝見。

李實遇楊善、趙榮於懷來。以在虜與也，先應答之辭。及彼中事情，并奉迎上皇之意，具與善等言之。俾無背馳以全終始。實等至京朝見，上御文華殿召實，賜問曰：也先有甚麼說話？實悉陳前詞。又問：太上皇帝如何說？實頓首奏曰：上福陛下。備陳太上皇前旨，皆無遺。上曰：也

先請和之意。虛實如何。實對曰。臣入番境。彼處虜人舉  
皆忻悅。夾道謳歌。沿途乳酪。勸臣飲之。咸願和好。蓋因  
彼處人馬相繼病歿。又因離家年久。論其和意。似有實  
情。望陛下處置。上曰。一路辛勤驚恐。賜鈔三千貫。羊二  
隻。酒十瓶。虜使把禿奏討迎駕大臣。上不許。寧陽侯陳  
懋。吏部尚書王直。禮部尚書胡濙。奏實至自虜中。言虜  
欲和。且還大駕。又引實至上皇所。上皇諭虜請和非僞。  
慎勿疑阻。朕需少物作人事。汝歸爲朕取來。朕得南還。  
卽令朕守祖陵。或爲庶人。朕亦甘心。乞再遣實奉衣物  
禮幣迎復上皇。上不聽。曰。虜情叵測。實歸善復去。不  
必更使。卽以迎上皇意勅也。先附其使去罷。丙寅。懋直等

再上言往者普化阿剌遣人議和。皇上不吝一介。今也先悔禍。專使行成。竟不一報。適啟戎心。後患無已。上亦不聽。下大臣再議。丁卯李實言臣自瓦剌還時也。先與臣約。八月五日來迎上皇。臣言需歸朝請旨。未敢訂定期約也。先言正使卽未遣。須先遣一二人同我使來報。不然勿謂吾失信。遂令諸小酋偕少卿羅綺收還大同宣府塞上部落。臣過懷來。見官軍出郊芻牧。收禾轉餉。虜言可信。臣復命日。蒙召對。詳述虜情。近在廷大臣累疏未允。臣將命講和。其欲遣人迎復。定約日期。臣特傳也。先口語伏望俯從群言。別遣材智大臣往迎上皇。雖虜情變詐不測。亦可塞彼無詞。不然直在彼曲在我。猶



豫趙趙過期失約復欲遣使或又命臣臣自揣愆期決不敢往彼此相疑和議不成則上皇終不可入干戈終不可息邊鄙終不可寧䟽入復下大臣再議是日遣把禿等還諭也先曰把禿等至悉議和之意顧前已遣楊善趙榮齎書幣至可汗及太師專爲迎朕兄太上皇帝朕念朝廷自祖宗來待瓦剌甚厚一旦因嫌搆隙連兵太師旣能復修舊好朕亦當勉從所請繼今益宜上順天意下順人心休兵息民以實前言把禿等回特頒賞給至可領也所言欲送還大駕實朕至願果出誠心卽令楊善等奉迎還京朕當永保和好太師其深省之是日愆直等復請再遣實奉迎上皇上曰俟善還時御史

畢驚等。翰林檢討邢讓皆疏乞專遣人迎駕不聽。  
元良哈寇山西。鎮守山西副都御史羅通。鎮守鴈門副都  
御史朱鑑禦却之。○八月楊善趙榮至虜營。見上皇。癸酉  
上皇發迤北。

楊善等入虜境也。先密遣人點慧者田氏來迎。且探其  
意。相見云。我亦中國人。被虜于此。因問向日土木之圍。  
南朝兵何故脫衣甲而走。荅曰。太平日久。將卒相安。況  
此行。只是扈從隨駕。初無號令對敵。因四方無虞。只營  
修寺宇而已。何曾操習。被爾虜兵。陡然衝突。如何不走。  
雖然。汝虜幸而得勝。未見爲福。今皇帝卽位。聰明英武。  
納諫如流。有一人獻策云。虜人敢入中國者。只憑好馬。

扒山過嶺越關而來。若一帶守邊者。俱做鐵頂橛子。上留一空。安尖頭錐子。但係人馬過的山嶺。遍下錐橛。來者無不中傷。卽從其計。又一人獻策云。如今大銅銃。只用一箇石砲。所以打的人少。若裝雞子。大石頭一斗。打去。迸開數丈。濶着人馬。卽死。打中最多。也從其計。又一人獻策云。廣西四川等處。射虎弩弓。毒藥最快。若箭頭搽此毒藥。一着皮肉。人馬卽死。今從其計。已取的來。天下選了三十萬有力能射者。演習。曾將有罪人。試驗。箭去着皮就死。又一人獻策云。如今放火鎗者。雖有三四層。他見放了。又裝藥。便放馬來衝躡。若做大槊兩頭銃。裝鐵彈子數箇。搽上毒藥。排於四層。候馬末齊發。俱打。

穿肚。曾試驗三百步之外者皆然。獻計者皆陞官加賞。天下有智謀者聞知。莫不皆來操練的軍馬。又精銳可惜無用了。虜人曰。如何無用。若兩家講和了。何用。虜人聞此言。潛去報知。次日至營見也。先問曰。汝是何官。荅曰。都御史。曰。兩家和好許多年。今番如何拘留我使臣。減了我馬價。與的段疋。一疋剪爲兩疋。將我使臣閉在館中。不放出。這等計較關防。如何。荅曰。彼先汝父差使臣到我太宗宣宗皇帝前進馬。不過三十餘人所計物件。十與二三也。無計較。一向和好。汝今差來使臣多至三千餘人。一見皇帝。每人便賞織金衣服一套。雖十數歲孩兒也。一般賞賜。殿上筵宴爲何。只是要官人面上。

好看臨回時。又加賞宴。差人送去。何曾拘留。或是帶來的小厮。到中國爲奸爲盜。俱怕使臣知道。從小路逃去。或遇虎狼。或投別處。中國留他何用。若減了馬價一節。亦有緣故。先次官人寄書一封。着使臣王喜送與中國某人。會喜不在。誤着吳良收了。進與朝廷。後某人惧朝廷疑怪。乃結權臣。因說曰。這番進馬。不係正經頭目。如何一般賞他。以此減了馬價段疋。及某人送使臣去。反說是吳良詭計減了。意欲官人殺害吳良。不想果中其計也。先荅曰者。然辭也。又說買鍋一節。此鐵鍋出在廣東。到京師萬餘里。一鍋賣絹二疋。使臣去買。止與一疋。以此爭鬪。而賣鍋者閉門不賣。皇帝如何得知。譬如商

朝人問使人買馬。價少便不肯賣。豈是官人分付他來也。先笑曰者。又說剪開段疋。是回回人所爲。他將一疋剪做二疋。送與官人充做課程。若不信。去搜他行李。好的都在。也先曰者。都御史說的皆實。如今事已往。都是小人說壞。因見說的意思和了。又曰。官人爲北方大將帥。掌領軍馬。却聽小人言語。忘了大明皇帝厚恩。便來殺擄人民。上天好生。官人好殺。將無罪人民擄去。有想父母妻子脫逃者。挈住便剜心摘膽。高聲叫苦。上天豈不聞知。荅曰。我不曾着他殺。是下頭人自殺。又曰。今日兩家和好如初。可早出號令。收回軍馬。免得上天發怒降災也。先笑曰者。問皇帝回去還做否。荅曰。天位

已定難再更換也。先曰：堯舜當初如何來？答曰：堯讓位于舜。今日兄讓位于弟，正與堯舜一般。有知院伯顏帖木兒說將這使臣留下，再差人去問來。還着這皇帝做，然後放去。不然，不要放去也。先曰：當初問他要大臣來迎，既差來，又去問，是我失信了。着他迎皇帝去罷。有平章昂克說汝來取皇帝，將何財物來？答曰：若將財物來，後來說官人愛錢了。若空手迎去，見得官人有仁義，能順天道，自古無這等好男子。我監修史書，備細寫上，着萬代人稱贊也。先曰：者者，都御史寫的好者。次日方見太上皇帝。明日也先設筵宴，與上皇送行也。先自彈琵琶，妻妾奉酒也。先曰：都御史坐。上皇曰：太師著坐，便坐。

對曰。雖居草野。不敢失君臣禮也。先顧羨曰。好禮數。宴畢也。先送上皇去。明日又設筵宴。與使臣送行。至午後而罷。又明日伯顏與上皇送行。又明日與使臣送行。次日駕起也。先率衆頭目羅拜而別。伯顏帖木兒領大軍護送至野狐嶺。痛哭別去。仍令大頭目率五百騎送至京師。行未數里。忽有五十餘騎追來。上皇失色大驚。及至。乃是平章昂克。因而回獵。射獲一獐來獻。受而去。駕入關。送的頭目緊隨上皇。不離左右。至東華門。住乘輿。揭簾視見。候人。然後就館。

千戶龔遂榮下錦衣獄。尋釋之。

上皇之發迤北也。庚辰遣太常少卿許彬。至宣府奉迎。



工部尚書高穀給事中劉福等言奉迎上皇禮不宜太薄上不喜壬午上皇至宣府癸未千戶龔遂榮匿名投書於高穀所穀袖入傳示文武大臣石亨于謙等不敢發一言王直胡濙謂禮失而求諸野欲以上聞已而衆出危言遂止給事中葉盛程信于太上䟽言諸大臣持一帖群立午門傍聚觀議論籍籍乞宣問之書言上皇之出以宗社故非遊畋也都人聞上皇且還無不踴躍今迎復禮宜厚而上亦宜避位懇辭而後復位否則貽譏萬世上詰諸大臣從何所得大臣言得書於穀所上曰朕未嘗塞言路穀大臣胡不告朕爲匿名書遂榮恐累高穀乃發憤自白曰書本臣出縛下錦衣衛獄上亦

不能深罪也尋釋之

丙戌上皇入居南宮。勅免群臣朝見。

禮部尚書胡濙等又言奉迎禮不可簡稍益故儀注。請備法駕候安定門外。內批虜詐未可信。備禮遠迓轍中虜計。奈何。大兄入城事在朕躬。朕迎東安門內。同百官隨至南城。卿等勿再紛更。甲申遣翰林侍讀商輅候上皇於居庸關。上皇勞輅諭曰。朕還京愿居閑。卿爲朕寫書。皇帝知朕意。并詔文武群臣。丙戌上皇至京師。自東安門入。上迎拜。上皇荅拜。上皇入南宮。百官隨至南城。請朝見。勅曰。先帝遺命。祖宗鴻業。付畀於朕。深爲荷負之重。朝夕惶懼。以圖法天。去年秋醜虜傲虐背恩負德。

拘我信使率衆臨邊有竊窺神器之意朕不得已親率  
六師往問其罪不意天示譴罰被留虜中屢蒙聖母上  
聖皇太后皇帝賢弟篤念親親之恩數遣人迎取上賴  
天地大恩祖宗洪福幸得還京爾文武群臣欲請朝見  
重以眇躬辱國喪師有玷宗廟又何顏見爾群臣乎所  
一請不允故諭癸巳上宴瓦刺使人於奉天門明日上皇  
宴之南宮乙未陞賞瓦刺使人有差

內閣苗衷致仕○以刑部右侍郎江淵兼翰林院學士直  
文淵閣○陞候璉兵部尚書尋卒

先是貴州苗叛攻圍新添平越諸衛道梗弗通城中食  
且盡時普定圍尤急璉自雲南選善射者爲前鋒自將

至晉定疾戰天下如雨賊大敗圍解遂趨貴副總兵田禮等以兵來會克隆里甕城羊賜楊老諸寨新添平越清平都勻諸圍俱解帝嘉其功遂遷尚書又進克平莊堡長官司時暑雨方盛疫癘大作璉得疾昇歸晉定卒命保定伯梁瑤右都御史王來督同叅將都督方英陳友等征湖廣貴州等處苗寇

先是靖遠伯王驥與都督宮聚張軌等還自麓川卽命征苗聚軌皆失利惟驥擒其酋重富檻送京師然苗勢愈熾驥亦不能定秦言久在南裔身染瘴毒乞還朝廷乃以珩等代之先是永樂間韓瑋來降者多安置於河間東昌等處生養蕃息驕悍不馴方也先入寇之際皆

將乘機竄動幾至變亂至是發兵征湖貴及廣東西諸處寇盜平謙奏遣其有名號者厚與賞犒隨軍征進事平遂奏留於彼於是數十年積患一旦潜消

石亨楊洪率師分道出紫荆居庸關巡哨大同宣府○九月上皇在南宮○改江淵戶部右侍郎進商輅翰林學士○冬十月改王驥爲南京兵部尚書總督機務○十一月以副都御史羅通協贊京營軍務○封宣府總兵都督朱謙爲撫寧伯

謙以都督充鎮朔將軍總兵宣府時虜入石峰口又入龍門關謙不能禦禦輒敗都督江福援謙又敗詔詰責謙已而與虜戰斬首中律封撫寧伯

普化可汗也先並遣使貢馬

也先念上皇亦遣人貢馬。所遣使人逾三千之數。乃出五軍神機營官軍萬五千屯列居庸關。十一月也先使還。來也先曰。爾瓦剌都總兵答剌罕。太師淮王大頭目中書右丞相也先遣使來貢并覽奏具悉。太師敬順天道。尊事朝廷。保守兩國祖宗來和好之意。甚善。自今宜安分順理。勿聽惑浮言。否則利歸於下。怨歸於上。太師祭之。朕與朕兄太上皇帝骨肉至親。毋勞太師念所貢馬疋鼠皮賜賞。并奏求物討回人口。悉付來使假金三兩坐罪論發。太師知之。

南京吏部尚書魏驥南京國子監祭酒陳敬宗並致仕

魏驥浙人初爲松江教官汲汲成就人材諸生在學居者候一更盡必携茶往視之見書聲供酒一甌而反至三更將盡必携粥以隨尚有誦書者供粥一碗且嘉其勤如此者亦不煩數間旬一行士子咸感激後出其門者顯宦甚盛爲考功員外郎有聲遷太常少卿拜吏部侍郎尋至太宰篤尚斯文性好吟咏矍然若不勝衣中官王振亦重之呼爲先生贊見惟帕一方振亦不較以引年致仕內閣陳循驥考試時所取士也請曰先生雖位冢宰然未嘗立朝愿少待之事在吾輩而已驥不從退謂人曰渠將朝廷事爲一己私事安得善終○正統間敬宗以南京國子祭酒九載奏績之京時中貴有柄

國者勢傾朝野素慕敬宗人品高欲置之門下適工部侍郎廬陵周忱巡撫南畿時亦在京進謁中貴知其與敬宗同年微露其意周詣敬宗以其意達之敬宗曰余忝爲人師表而求謁中貴他日無以見諸生周因諷中貴曰陳蔡洒書法極高姑以求書爲名先之以禮幣彼將謁謝矣中貴然之乃遣人致綵段羊洒求書程子四箴敬宗爲走筆書之而返還其禮幣竟不往見故爲蔡洒十八年更不遷轉于是士大夫益高其風節云

以沐麟爲都督同知征南將軍總兵鎮守雲南○十二月禮部尚書胡濙請明年正旦百官朝上皇於延安門不許○荆憲王請朝上皇不許○命僉都御史王竑總督漕運



○革提學憲臣

辛未二年春正月上皇在南宮○二月大理寺丞薛瑄陞南京大理寺卿

時蘇松饑民貸粟富民不得遂火富人屋竄海中王文節幾坐謀反文清抗章辯之獲免是冬御史劉孜薦文清粹學飭躬進無所求退無所累實君子之儒不宜置之閑遠乞召供館閣之職俾講學輔導必有裨益上曰內閣本朕簡任非人所得薦不許

也先謀爲可汗劫掠普化○調兵部右侍郎項文曜爲吏部右侍郎

文曜媚附于謙每待漏時必附謙耳密言及朝退亦然

行坐不離時以文曜爲子謙妾內議患其黨比乃調曜於吏部時又有兵部侍郎王偉謙所薦也偉廼伺謙過密奏之帝任謙方專名入以偉奏手授偉問聖諭何事謙笑曰吾有不是子言之未必不從何忍至此偉惶愧

翰林學士周叙請面見說事不行

叙上疏曰臣職叨班行伏見永樂洪熙宣德三朝臨御大班旣退卽於午門上說事各衙門官輪流向前君臣相與商確政務罄盡所言人懷畏憚而事機不泄成密勿廟堂之美自正統來王振擅權獨立在傍於是輔弼大臣及近侍官員不得召對亦不敢盡言以釀成今日之禍宜令群臣依舊制輪流向前說事上與敷對令知

他人不得預聞庶得吐露肝膽而不宣泄於外時不能行

三月賜進士柯潛等二百人及第出身有差○都御史王來擒湖廣苗匪韋同烈者爐山平○文選郎中李賢上正本十策命翰林繕寫置諸左右

李賢上正本十策曰勤聖學顧箴儆戒嗜欲絕玩好慎舉措崇節儉畏天變勉責近振士風結民心大略言朝政闕遺有司利弊生民休戚中外進言已詳然有關於上之身心者或略臣以爲陛下一身國家天下之本而心又一身之本也正其本萬事理惟陛下之心旣正則國家天下之事可以次第推行乞留中以時省覽詔付

外既而給事中李侃等以災異上疏謂李賢忠言宜賜採納乃復取奏入命翰林繕寫置諸左右禮部尚書楊寧見其奏歎息謂賢曰吾讀崇節儉一事殆欲下淚也時帝頗事聲色奢侈嘗以銀豆金錢等物撒地令宮人及宦侍爭拾為開笑編修楊守陳賦銀豆謠未及上京師傳之尚方承詔出九重治銀為豆墜良工類穎勻圓奪天巧朱函進入蓬萊宮御手親將十餘把琅琅亂灑金苔下萬顆珠璣走玉盤一天雨雹散驚瓦中琅玕拾多盈袖金襴半墜羅裳絢霧得天雨袍散驚瓦中賜歸來坐清晝聞知昨日六宮中翠娥紅袖承春風黃金芥豆競拾得羊車不至愁烟空別有銀壺薄如葉并刀剪碎盈丹匣也隨銀豆灑金塔滿地春風飛玉蝶君不見民餐木皮和草根憂如豆食如八珍官倉有米無銀糶探取盡作溝中瘠明主由來愛一頓安邦只在山窮民願將銀豆三千無活取枯骸百萬人在五月命江淵巡視淮徐諸郡○六月朔日有食之○秋七

月尚書石璞兼大理卿總督軍務轉餉獨石○冬十月浙江福建盜平進孫原貞爲兵部尚書鎮守閩浙兩省地方原貞於浙江奏立宣平雲和景寧泰順四縣福建立永安壽寧二縣地方以寧

巡撫江南工部尚書周忱致仕

忱字量恢弘才識通敏蒞事精勤臨民和易有善謀者雖卑官賤吏破去崖岸開心訪納性尤機警籌畫諸郡一錢穀鉅萬一屈指無遺筭嘗爲冊曆記日所行事及陰晴風雨有告報輒按據詰訊人莫能欺每出會計視地豐凶事緩急爲弛張調劑變通民無逋負官有餘積前後理財者皆不能及○初蘇松一帶稅糧有五六年未

完者朝廷遣官催促相繼終未能完忱爲巡撫不一二年累欠數皆完羨餘之積日見充溢小民賴以賑恤歲凶無慮歲輸京師之米甲於諸省朝廷每勞其能亦善於附勢中官王振極重之間報餽遺往往不吝客遊其地者無虛日八人得其歡心釋子道人皆往見之所獲必過望又令其子納馬得官士林以此少之

陞李賢爲兵部右侍郎

時有詔令廷臣共議備邊長策李賢上言虜所以敢輕中國者恃其弓馬之強而已臣觀今日之拒馬木止能拒馬不能避箭挨牌止能避箭不能拒馬今中國長策一惟有所謂戰車若衛青之武剛車可以禦之又有取勝

之道則火鎗是也論中國之長技無出於此若用得其法虜弗能當也臣觀車制四圍箱板內藏其人下留銃眼上開小窓長一丈五尺高六尺五寸前後左右架排銃頭每車前後占地五步若用車一千輛一面二百五十輛約長四里欲行則行欲止則止謂之有脚之城內藏軍馬糧草輜重以此禦敵使馬不得衝陣箭不得傷人彼若近前火炮齊發奇兵繼出彼若遠遁我勢益張我威益振備邊長策莫善於此遂陞兵部右侍郎○按春秋時晉荀吳毀車崇卒以致車戰法亡而說者又謂漢衛青唐哥舒翰皆嘗用車戰以破敵則是其法猶未善也但後來用車戰者不唯失利且車亦牽制難行至

一目爲鷹鵠車謂其行不得也李賢猶陳車戰之利者豈亦未嘗試與

十一月命昌平侯楊洪總兵鎮守宣府僉都御史李秉總督邊儲叅贊宣府軍務○十二月進陳循少保文淵閣大學士高穀少保東閣大學士○以禮部左侍郎王一寧國子祭酒蕭鎡並兼翰林學士內閣辦事○禮部尚書胡濙請令百官朝賀上皇萬壽節於延安門不許○改禮部尚書楊寧爲南京刑部尚書○調中書舍人何觀於外任時觀辦事文淵閣奏言大臣如尚書王直胡濙等正統中皆阿附權姦今此輩老猾不宜在左右及言北虜來朝宜驅置于南方下科道看議以聞吏科給事中毛玉



看奏稿謂觀誣陷大臣擅開邊釁正觀罪等語同列  
林聰無盛皆勸玉易稿不從盛曰朝廷大開言路未嘗  
罪進言者雖罪觀猶令我曹看議蓋甚盛德也君獨不  
念劉球之事乎球之友人至今以王振馬順爲恨此諸  
君所親見也雷電之下萬一不測是我曹爲之而成朝  
廷不容直言之名且諸君亦言官獨不爲他日計乎玉  
意解乃稍易數語奏上詔令錦衣衛杖觀調外任明日  
盛道遇錦衣二鎮撫語及杖觀事皆曰彼何深罪杖惟  
一具數耳是武臣猶知事體毛玉言官顧獨覘望云

壬申三年春正月上皇在南宮○遣使貽瓦刺可汗書  
書云我國家自祖宗來與可汗無嫌已因使臣往來問

儲生隙除前事不必留意念可汗能敬順天道復遣使  
皮兒馬黑麻等遠來朝貢厚意良善朕優與陞賞宴勞  
酬貢馬直可汗索器附去但云答使事往有報書恐小  
人有短長言語傷和好徒使利歸於下怨結於上但瓦  
剌人朝貢者聽然亦須人少賞待可得厚中國人民用  
女在瓦剌者後使與偕來重賞不吝

以刑部侍郎耿九疇鎮守陝西

先是陳鑑以進士爲御史陞按察司副使副都御史鎮  
陝西慈惠清慎悉民疾苦不作聲色專務安輯凡練兵  
屯田水利鹽法事事各有經畫在陝十餘年教興政理  
每入朝民必遮道送不忍舍比還歡迎父老或走數程

久旱鑑至卽雨雨久鑑至必舉人益愛戴之初薦按察使王文入內臺正統景泰間文與鑑更出鎮陝西至是文當出陝代鑑文不欲行諷諸御史言已風采乞留內臺乃以耿九疇出鎮陝西疇至除弊屏貪威望大著先是巡撫多部寺司堂上官文移不得輒下按察司按察亦不肯受約束疇奏得徑下又邊將請增臨洮諸衛戍兵下疇議言邊城士卒不爲少將官能嚴紀律精練習勤撫恤絕侵漁養銳氣一可當百加以賞罰明信人人自奮不然徒冗食耳竟不增戍

河決沙灣命左都御史王文行視河道

先時訓導陳冕以修築沙灣功陞教授比沙灣復決冕

奏言欲息斯患在用人工部惡冕請送冕山東巡撫責其成功否械赴京師既得旨給事中陳嘉猷言朝廷嘗榜求治河之略竟未有言冕嘗有修河績今更進言而工部嫉之必欲置諸有罪之地人人皆將緘口不言其他利病甚於此者孰肯復言冕不足恤而國體所關甚重乞令冕協同巡撫等官修築便上從之

于謙石亨請討虜不許

時普化可汗與也先相讐殺謙亨乞統兵出宣府大同討虜復讐上不許

二月也先遣使獻捷

也先言故父脫歡得阿魯合部落以可汗虛位乃立普

化普化正堂也先姊也有子不得爲太子乃以他妻子爲太子也先諫之不從顧攻也先也先不得已與戰敗之普化率十餘騎遁去也先盡收其妻妾太子人畜獻良馬二疋奏捷命宴其使賜紗幣。

進內閣江淵吏部左侍郎蕭鑑戶部右侍郎○召左都御史王翱掌院事

先是東虜殺掠吏民師出輒北遼東西震動且撼漁陽翱以僉都御史提督軍務明年陞副都御史留撫遼東以出塞破虜有功陞右都御史尋陞左是時虜分寇廣寧翱清野困之虜退去召還臺

三月彭時復爲翰林侍讀○有星孛於畢○夏四月命都

督孫安鎮守獨石以葉盛爲山西叅政協贊軍務程信爲山東叅政督餉遼東

先是獨石馬營等八城遇虜失守殘毀未復議者欲棄之于謙曰棄之則不但宣府懷來難守京師不免動搖乃薦安授以方略仍命盛替其軍盛至列其利害爲八條以進次第行之與安率兵度龍門關且戰且守八城完復如舊盛又請官銀五千兩買牛千餘頭摘戍卒不任戰者俾事耕稼歲課餘糧于官凡軍中買馬除器勞功恤貧諸費皆于是乎取給盛在獨石五年邊人賴以歡給

太學士商輅上言邊務請行屯田

輅上言邊務訪得口外田地極廣因先前在京功臣等  
官將口外附近各城堡膏腴田地占作庄田其諸空閑  
田地又被鎮守總兵叅將并都指揮等官占爲己業軍  
士無近便田地可耕夫且耕且守如漢趙充國諸葛亮  
晉羊祜曾有已行之明効今日守邊之要莫善於此若  
舍屯種之外而欲邊城充實雖傾府庫之財竭生民之  
力奈軍士數多歲月久遠亦難繼矣事下該司議行○  
按王鏊曰國家邊費最大欲省轉運之費莫若興屯田  
兵法取敵一鍾當吾二十鍾屯田一石可當轉輸二十  
石趙充國留田湟中內有亡費之利外有守禦之備卒  
坐困西羌唐韓重華營田之利東起振武西逾雲州極

於中受降城歲省錢三百萬緡此前事之明効也今三邊之地固在也而人以爲不可行者何哉整之此論誠當今之急務也

增東宮官胡濙主直爲太子太師陳循高穀于謙爲太子太傅王文何文淵爲太子太保江淵王一寧肅鉉爲太子少師商輅兵部左侍郎兼左春坊大學士○五月甲午廢皇太子見深爲沂王立皇子見濂爲皇太子廢皇后汪氏立妃杭氏爲皇后

景帝欲易太子恐文武大臣不從先於閣下諸學士各賜金五十兩銀倍之陳循等惟知感惠遂以太子爲可易時有廣西潯州守備都指揮黃珌者思明土知府瑯



庶兄也瑯老子鈞襲知府玠欲殺均襲知府與其子矯  
軍門令徵兵思明令其子糾諸心腹驍悍數千人去府  
城三十里結寨夜馳報府城滅瑯家支解瑯父子納魏  
中丞後圃即引衆還寨明日城中報至佯不知驚哭仆  
地揮淚遣人告玠急捕賊復此家門大讐方玠子殺瑯  
時瑯有僕福童藏屏處見玠子并誠其左右人福童得  
脫走憲司訴玠父子殺瑯父子狀郡中人亦皆知賊本  
玠父子也左副總兵武毅疏聞于朝玠大惧謀于侍郎  
江淵遣千戶袁洪走京師上奏請廢太子立見濟爲太  
子疏曰太祖百戰艱難取天下期傳之萬世往年上皇  
輕身樂虜文武將吏十喪八九駕陷虜庭寇至都門幾

喪社稷不有皇上臣民何歸今且踰二年皇儲未建臣  
惟人心易搖多言難定爭奪一萌禍亂不息皇上卽循  
遜讓之美復全天叙之倫恐事機叵測反覆靡常語曰  
天與弗取反受其咎近日仰觀天象土星逆行入太微  
垣與諸災變皆可畏懼願早留意萬一羽翼長養權勢  
轉移委愛子于他人空寄名于大寶皆除之下變爲寇  
讐肘腋之間自相殘虐陛下此時悔之晚矣乞與親信  
文武大臣密定大計以一中外之心絕覬覦之望疏入  
景帝大喜曰萬里外有此忠臣亟下廷臣會議且令釋  
茲罪。陞都督。是月乙酉禮部尚書胡濙侍郎薛琦鄒幹  
集文武群臣廷議王直干謙等相顧莫敢發言久之司

禮監太監興安厲聲曰。此事不可已。卽以爲不可者。勿署名。無得首尾持兩端。群臣皆唯唯。署議於是。胡濙暨魏國公徐承宗。寧陽侯陳懋。安遠侯柳溥。武清侯石亨。成安侯郭晟。定西侯蔣琬。尚書王直。陳循。高穀。何文淵。金濂。于謙。俞士悅。左都御史王文。王翱。楊善等。六科都給事中李讚。李侃。李春。蘇震。林聰。張文質等。十三道御史王震。朱英。余謙。丁大亨。強宏。劉琚。陸厚等。上言。父有天下。必傳于子。陛下膺大明命。中興邦家。統緒之傳。宜歸聖子。黃珌奏。是制曰可。朕上請聖母。上聖皇太后。太后言。予老矣。願宗社安。天下得太平。人心旣如此。不可拂朕敬承慈命。禮部具儀。擇日以聞。卽日簡置東宮官。

亨懋、凌直四人。太子太師山循、穀謙四人。太子太傅軌、文淵、廉儀、銘、士悅、石璞、鎰、文翽九人。太子太保淵、一寧、鉉三人。太子少師俞山、太子少傅錫、維禎、俞綱、羅通四人。太子少保五月甲午立。見齊爲皇太子。廢汪皇后立。見齊母杭妃爲皇后。后兄杭聚爲錦衣正千戶。詔曰：「天祐下民，作之君。」實遺安於四海。父有天下，傳之子。斯本固於萬年。大赦天下。先是一日，陳儀仗奉天門，有男子執赤挺，直入擊香亭，奮呼曰：「先打東方甲乙木，諸內使急縛男子。」詔付錦衣獄。乙未，以東宮令大賞文武官吏。軍士丙申，禮部言太子冲年，百官朝朔望。丁酉，柳溥于謙充正副使持節，更封皇太子。見深爲沂王。○先是帝

欲易儲語。太監金英曰。七月二日東宮生日也。英叩頭云。東宮生日。是十一月初二日。帝爲默然。蓋帝所言謂見濟英所言者。謂上皇長子也。與魏徵獻陵之對相似。英之賢。若陳循于謙輩。亦可以愧死矣。

大赦黃珖爲都督。○命李賢姚夔等巡行天下考察庶官。○秋七月。命左都御史王翱總督兩廣軍務。

時南蠻寇兩廣。兩廣副總兵董興武毅。觀望不肯戰。巡撫侍郎揭稽。李棠不相統。賊益熾。于謙請用安遠侯柳溥。總督兩廣軍務。如溥未可出。臣謙及戶部尚書金濂。左都御史王翱。乞用一人。上命翱往。蠻尋平。

巡撫廣西刑部侍郎李棠致仕。○罷兩廣守將董興武毅。

以副總兵翁信陳旺鎮守廣東廣西○罷四川巡撫僉都御史李匡以提督松番兵備侍郎羅綺及總兵都督徐海整飭四川邊務○內閣王一寧卒○殺御用監左少監阮浪

御用左少監阮浪侍英廟南宮浪下內官王堯者往御溝橋抽分浪以南宮所賞鍍金梁扣綉茄袋鍍金結束一把與堯歸飲錦衣指揮盧忠家蹴毬褌衣忠因見其袋刀非常制遂令妻進酒醉忠解之俄而入皇城白裏行太監高平以爲南宮欲謀復皇儲令浪遺堯以袋刀賞忠求外應堯竟以此與浪義子趙縉皆凌遲沒產浪入詔獄炮烙煅煉苦楚備至卒不承承獄中○帝旣

殺阮浪猶欲窮治不已。盧忠嘗屏人請卜者。全寅筮之。寅以大義叱之曰。是大凶兆。死不足贖忠懼。乃佯狂爲風狀。學士商輅與司禮監太監王誠等言。盧忠是箇風子。豈可聽信他。壞了大體。傷骨肉之情。乃已。○寅。山西安邑人。少瞽而性聰警。學京房易。占斷多奇中。名聞四方。正統間客游大同。上皇旣北狩。陰遣使命鎮守太監裴當問寅。寅筮得乾之初九。附奏曰。大吉。可以賀矣。龍君象也。四初之應也。龍潛躍必以秋應。以壬午浹歲而更龍變化之物也。庚者更也。庚午中秋車駕其還乎。還則必幽勿用故也。或躍應焉。或之者疑之也。後七八年必復辟午。火德之王也。丁者壬之合也。其歲丁丑月壬。

寅日壬午乎。自今歲數更九。躍則必飛九者乾之用也。南面子衛午也。其君位乎。故曰大吉。旣而也。先復入寇。京師戒嚴。寅時在石亨幕下。召問休咎。寅筮之曰。無能爲也。且彼氣已驕。戰之必克。虜果敗去。踰年也。先欲奉上皇南還。時率以爲詐。獨撫寧伯朱謙上書懇請朝廷。持不敢發。寅力言于亨曰。虜人順天舉義。我中國反失奉迎之禮。獨不爲夷狄笑乎。亨乃與于謙從朝議。遣使虜果奉乘輿來歸。

八月癸亥晝見○九月南京兵部尚書王驥致仕○冬十月太子太保左都御史王文爲吏部尚書兼翰林學士直文淵閣



王文與中官王誠結爲兄弟。謀入內閣。嘗私以語高穀。穀亦嫌陳循獨見寵任。思有以間之。乃疏請增內閣員。云不拘繁劇衙門。得旨下內閣推舉。陳循曰。旣不拘繁劇衙門。則三法司亦可舉。乃舉都御史蕭維禎。穀遂舉王文奏上。果用文。

召征苗總督都御史王來還京。○改各處鎮守侍郎爲巡撫都御史。

時議以鎮守侍郎與巡按御史不相統屬。文移往來多窒碍。難於行事。故改爲巡撫都御史。國朝初制。歲遣監察御史巡按方隅。或大災重患。乃遣廷臣行視。謂之巡遊。事而止。無定員也。宣德中以關中江南等處地大。

而要更命官更代巡撫不復罷去正統末南方盜起北虜犯邊於是內省邊隅徧置巡撫官矣

也先請命使往來不許

也先遣人來貢馬請命使往來上曰正統中緣使臣往來構隙幾危宗社今聽虜使朝貢優其賞宴爲便遂勅邊鎮練兵防虜

十一月己未朔日有食之○癸未客星見輿鬼○宴瓦剌使臣於禮部

是月宴瓦剌使臣太尉察占平章哈只阿力等二千九百四十五人於禮部令人得買瓦剌使臣馬瓦剌使臣携纍虜中國男女百餘人至會同館詔諭使臣人與贖

綵幣二表裏使臣初詐言普化并也先令携還中國人已乃匿不發贖纔十二三

十二月命僉都御史李秉提督宣府軍務兼巡撫○命僉都御史王珣巡撫江北仍總督漕運清理鹽法○少傅王直請答使瓦刺不許

少傅王直請答使瓦刺下兵部謙言臣職兵戎知戰而已若賊渝盟敢爲悖逆當肅將天威往正其罪道使事不敢預議制曰使勿遣是冬也先及其諸酋乞黃紫織金九龍紵絲及金酒器藥材顏料樂器佩刀諸物禮部言龍袍金器非所宜用乞勿與與藥材諸物當是時也先使每至京幾千人出入驕恣毆守衛掠人財物至欲

騎入長安門。稍稍約束。卽彎弓持刀。言奪馬殺人通事。都督昌英。每好語阻之。不聽。輒侮罵使貢在朝。時入塞捕掠人畜。將官請勦。又以通好故。恐貪功啟隙。不欲與戰。虜益驕。東結朶顏。西交哈密。脇結赤斤。蒙古。往往窺塞下。

三月。上皇在南宮。○吏部尚書何文淵罷。以

御史練綱等。上言舉用方面事例。有旨令禮部集議。吏部不俟議定。卽奏陞福建僉事李顥爲叅政。楊珏爲按察使。蓋吏部恐議定莫遂其奸耳。夫所舉縱皆得人。亦宜避嫌。况楊珏見爲副使曹祥發其賍私。且吏部推選

多不公。如向舉陝西按察使何自學。不能檢身齊家。爲家奴所殺。山東按察使張清。今爲尚書薛希璉所黜。副使張哲未任。爲都御史韓雍所黜。戶部主事楊愈。考平常例不當陞。乃陞河南知府。湖廣副使陳質。九年例陞二級止。陞叅政一級僉事。曾蒙簡未及一考。以殺賊功。陞一級。越陞左叅政三級。臣等非不劾奏。但給事中御史有以直言觸其同類大臣者。吏部尚書懷猜忌往往遏其見任之職。鉗其欲言之口。所以居言路者。以言爲諱。職風憲者。以職自保。寧負朝廷之恩。不敢犯大臣之怒。今吏部復爾專權。齎爵肆行欺罔。臣等如復不言。皇上深居九重。何由知其弊之若是。臣等非不知觸犯權

臣禍不能免。但朝廷耳目所係甚重。豈可知有權臣而不知有陛下。知有身家。不知有朝廷乎。請下太子太保兼吏部尚書何文淵。右侍郎兼少詹事項文曜于法司。明正其罪。文曜陰險奸邪。羣臣共知。比之文淵。情罪尤重。難佐天官。少保兼太子太師吏部尚書王直。太子太傅兼吏部左侍郎俞山。素行本殊於衆。今亦爲文曜等所愚。失於覺舉。亦宜究問。乞俯從臣言。命吏部但遇三品以上大臣舉用方面等官。每置二簿。鈐印。備書舉主與被陞者。一封進司禮監便御覽。一送翰林院備顧問。俟一考政績卓異者。賞舉主。政績無聞。及犯賊舉主同罪。上曰。御史職居言路。凡事當言。今所言俱是。但知人

之難從古爲然。已陞除者置不問。文淵、文曜等亦姑宥。自今選官務洗心滌慮。廣詢博訪。必從公道。毋得徇私。至是文淵罷。上命舉可稱任者。練綱率諸御史上言。左都御史王翱、嚴公峭、直右副都御史年富、操履端方。大理寺卿薛瑄持正不回。此三人者。擇而用之。庶能品藻人才。追蹤王直。於是召翱爲吏部尚書。翱嚴加考察。公銓注抑奔競。杜請託。一時任使並稱得人。

按李賢曰。何文淵守温州時。廉靜寡欲。一郡大治。召爲刑部侍郎。有餽金者。却之。好事者爲立却金館。後以病乞歸。正統間。天下多事。廷臣交章薦起爲吏部侍郎。遂進尚書。黜陟人才。詭跡始露。立身一敗。雖有喬新爲之。

子不能蓋其愆矣可不畏哉

改耿九疇爲副都御史仍鎮守陝西

時有旨買羊角爲上供燈九疇疏曰昔宋神宗買祈燈蘇軾諫止今買羊角製燈毋乃類是書曰不矜細行終累大德上遂止

是月復宴瓦剌使臣於禮部

春正月復宴瓦剌使臣察占等二千八百七十六人於禮部勅瓦剌太師淮王也先太師求答使朕恐使交搆彼此懷疑以故不遣太師遣人多二次三千餘人邊將堅請謝絕朕念太師忠義姑聽使人入京自後可少遣遣時與總數文書否守關者閉不納太師并各頭目差



正副使二十二人。陞都督都指揮、指揮、千戶等官賞金鑲犀帶九釵、花金帶九、素金帶三、花銀帶一。其三千餘人貢馬、貂鼠皮賞織金綵表紵絲二萬六千四百三十二絹九萬一百二十七。衣靴帽萬。諭太師知之。

三月以軒輓爲副都御史巡撫浙江。○夏五月歲星晝見。○王文憂去尋起復。○增定各省鄉試取士額數。

順天應天先一百名。今各增三十五名。浙江福建先六十名。江西先六十五名。湖廣先五十五名。河南先五十名。山東先四十五名。今各增三十名。廣東先五十名。四川先四十五名。陝西山西先四十名。廣西先三十名。今各增二十五名。雲南先二十名。今增十名。

秋七月也先弑其可汗普化而自立爲可汗

也先攻敗普化奔兀良哈依沙不丹沙不丹殺普化也  
先遂自立爲可汗盡殺故頭目苗裔殺白馬九黑牛五  
祭天期以八月入西番寇我甘涼

停輸豆武職管事世襲之例

刑科給事中曹凱上言。比者戶部請聽軍民官吏輸豆  
如輸豆四千石以上者授指揮。歷俸十六七年。償彼所  
輸豆倍半矣。又令管事世襲。煨生民脂膏。養無功之子  
孫於無窮也。諸有功者。必曰吾累世忘軀。獲此官。彼輸  
豆亦獲此官。朝廷以吾軀命。同於菽粟。其誰不解體端  
雖甚。弊流甚大。戶部無能足國。創此敗壞名器之例。

任本矣。若果識不到此乎。抑阿意權貴莫之敢阻乎。乞  
勅輸粟豆授武職者。帶俸不任事。不世襲。犯賊罪。如文  
朕止許原籍衙門帶俸終身。上曰。凱言有理。已授職者  
仍舊營事承襲。今後乃如凱言。○又給事中徐廷章。上  
言七事。一重官爵。言部增尚書一人。左右副僉都御史  
至三十餘人。人加師保名器猥濫。二慎師儒。今教官多  
歲貢監生。素無學問。授經且句讀不明。問難則汗顏莫  
對。宜用副榜舉人。三嚴科貢。四却珍奇。五固封守。六禁  
諂竇。七誅阿附。言何文淵奸邪免官。許資等依附文淵  
並宜治罪。上曰。朕卽位初。加秩舊臣。資匡輔其如故。餘  
下有司議以聞。

八月召大同總兵定襄伯郭登還朝

登初至大同。士可戰者不下數百馬百餘匹。不數年。馬至萬五千匹。精兵數萬人。又以已意。設爲攪地龍飛天網。鑿深塹。覆土木。人馬通行如履實地。賊入圍中。令人發其機。自相撞擊。頃刻千餘騎皆陷。內鎮守內臣陳公忌之。會姚都指揮發陳奸贓二十事。陳益疑登。巡撫沈固又言鎮守不和。乞更調。景帝乃召陳還。諭登留鎮。登憤邊事未戢。弊政猶存。思得公廉有爲者相與共事。上疏曰。往者承平日久。人心驕逸。在官旣無廉恥之心。蒞政惟肆貪婪之志。釀成汚濁之風。致有夷狄之禍。又曰。虜勢雖云請和。變態豈能預度。倘或渝盟。則大同一鎮。

甲午年八月  
首先受敵。及今無事之時。若不早爲措置。一旦賊至。又似前日手無所措。中國受傷已深。邊事豈容再壞。虜旣退。欲大興屯田。苦民力困乏。牛種俱無。疏乞官爲措置。至是以病召還。

命兵科給事中操練團營軍士

八月命兵科給事中鄭林操練團營軍士。林旣受命。遂以軒轅破蚩尤之陣。教閱軍伍。具疏繪圖以進。曰。臣通考古今陣法。莫有過於軒轅黃帝破蚩尤之陣。夫古之蚩尤。卽今之胡虜也。黃帝按井田作陣法。大軍歸中。專主旗鼓。八節旋繞。悉聽指揮。若正北受敵。則東北西北二陣爲奇兵。張左右翼以援之。若正南受敵。則東南西

南二陣爲奇兵張左右翼以援之。其正東正西及四隅受敵亦如之。所謂常山之蛇擊其首則尾應擊其尾則首應擊其中則首尾俱應者也。古之名將知此法者惟太公望孫武子韓信諸葛孔明李靖諸人而已。吳起以下莫能知也。其名之曰天地風雲龍虎鳥蛇八陣者則諸葛孔明也。一大陣之中固有八陣而小八陣之中亦各有八陣。大陣則法伏帑八卦小陣則法文王六十四卦。所謂陣間乎陣隊間乎隊者也。若夫造楯甲有九星開八門用三奇者則又黃帝命風后爲之也。蓋聖人以神道設教使人莫知其所以然也。大將居于玄武之位而北嶽則常山蛇也。故曰常山蛇陣。林時居兵科見團

營軍無統制每出征人馬多雜沓致失効其操練不如法當國者遂請以事委之林乃用此陣教閱隊伍始整其法至今便焉

九月召薛瑄於南京爲大理卿○太子太保左都御史陳鏐致仕○陞蕭維禎爲左都御史羅通爲右都御史○冬十月也先自稱大元田盛可汗遣使貢馬

十月也先遣哈只貢馬貂鼠銀鼠皮書稱大元田盛大可汗田盛華言天聖也末書添元元年中言往元受天命今得元位盡有其國土人民傳國王寶宣順天道遣使和好庶兩家共享太平又致殷勤太上皇帝上以書示禮官會議答書吏科都給事林聰言也先不敢輒稱

可汗使覘中國若輒從其稱長縱逆賊仍其故號激怒  
大羊乞勅其來使歸語也先以華夷之辨順逆吉凶之  
道庶不失國體便刑科給事中徐正乞賜也先勅曉以  
天命禍福成敗之理如其稔惡不悛我乃聲罪致討安  
遠侯柳溥言也先弑篡所謂亂臣賊子人人得而誅之  
若從其僞稱是與其弑主也答書宜仍稱瓦剌太師不  
絕其使彼犯我邊塞卽興師致討并下廷議議言自古  
王者不治夷狄也先稱大元田盛大可汗固不可從若  
可汗乃隋唐以來北狄酋長之常稱非中國所禁朝廷  
答賜勅書宜稱爲瓦剌可汗稍示羈縻上又下禮部議  
儀制郎中章綸言可汗二字在中國因爲夷狄酋長之



常稱在戎狄則爲皇帝之位號觀其稱唐太宗爲天可汗元世祖爲成吉思汗可見矣向者脫脫不花爲可汗乃其世傳所稱名猶近正也先弒主僭稱各實大舛今若因而稱之彼以爲中國天子亦稱我爲可汗誇示群酋群酋喪服無復携貳益窺中原後禍未測仍其故稱彼必慚怨益肆侵擾均爲不可莫若賜勅封爲敬順王稱爲瓦剌王便下廷議議言臣等議請稱也先爲瓦剌可汗詔令再議臣等以爲便給事中盧祥李鈞路壁等以爲不便欲仍稱太師乞聖裁上曰也先雖桀傲亦能敬順朝廷宜如議稱瓦剌可汗上遂勅文武督兵大臣也先擅易名號其所遣使從大同來或從宣府甘肅

來奸計叵測。京師備禦不可不嚴。爾等其選兵訓練。條上長策。聽便宜行事。并勅治邊城守戒嚴時。瓦剌使臣火只爾阿麻回回進玉斤九千九百斤。却令自售也。先弟賽因孛羅魯王諸酋亦遣人貢馬。自是稍出入東西塞上。爲寇不復深入也。先新立恐諸部不從。亦欲與中朝通好。貢市往來。然數年賞賜虜費亦不下百萬計。

左遷吏科都給事中林聰爲國子學正

先是廷議迎駕。惟一車二馬足矣。聰爲刑科言。上皇北狩。與陛下迎鑾。皆社稷綱常大計。宜厚無他。日悔及議。易儲聰首言。皇太子無過不可易。憤激不肯署名。雖竟不能沮。而人諒其忠。改右司直郎。商輅薦爲吏科都給

事中凡吏部選法或私有徇者輒指斥改易至屢疏劾之必置諸理而後已又屢糾劾諸當事大臣益多衆忌遂嗾御史王溥劾聰挾持吏部甥選教官得善近地下廷議文致其罪坐比擅選法戾大臣當連名署奏牘禮部尚書胡濙不肯署稱病臥數日上遣中使問濙對曰老臣本無病聞欲殺林聰殊驚悸遂病上立解聰左遷國子學正

徐理更有貞陞右僉都御史治張秋決河

侍講徐理上言人臣避國諱子孫避家諱禮也臣幼誤犯祖諱禮當避乃更有貞字元武是冬河決張秋石璞泊之久無功集議文淵閣推有貞擢僉都御史有貞

自北東徂南西。踰濟汶。沿衛及沁。循河道。濮范。究源流。度地行水。上䟽曰。臣聞平水土。要在知天時地利。人事而已。蓋河自雍而豫。出險之夷。水勢旣肆。又由豫而充。土益踈。水益肆。沙灣之東。所謂大洪口者。適當其衝。于是決而奪。濟汶入海之路。以去。諸水從之。而洩隄潰。渠淤。澇則溢。旱則涸。此漕途所由阻。然欲驟湮。則潰者益潰。淤者益淤。今請先䟽其水。水勢平。乃治決。決止。乃濬。淤多爲之方。以時節宣。俾無溢涸。必如是而後有成。制曰。可有貞往來。展布經營。作治水閘。䟽水渠。渠起張秋。金隄西南行九里。至博陽灤。又九里。至博陵坡。又六里。至壽張沙河。又八里。至東西影塘。又十有五里。至于白。

嶺灣又三里至李峯。由李峯而上。又二十里至蓮花池。又三十里至大豬潭。乃踰范旣濮。又上而西。凡數百里。經澶淵以至河沁。有貞曰。河沁之水。過則害。微則利。乃節其過而導其微。平其水勢。旣成渠。名廣濟。閘名通源。渠有分合。而閘有上下。凡河流之旁出不順者。則堰之。堰有九。長袤皆至萬丈。九堰旣設。其水遂不東衝沙灣。乃更北出濟漕渠。阿西郵東曹南鄆北。出沮洳而資灌。溉者爲田百數十萬頃。公又參綜古法。就長擇善。加神用焉。爰作大堰。其上捷以水門。下捍以長堤。堰崇三十有六尺。厚什之。長百之。濶廣三十有六丈。厚倍之。隄之厚如濶。崇如堰。長倍之。架濤截流。柵木絡竹。實之石。而

又以鐵蓋合土木火金以平水性而導汝泗之源出諸山引澶濮之流納諸澤又濬漕渠由沙灣北至臨清凡二百四十里南至濟寧凡三百一十里復作放水閘于東昌龍灣魏灣凡八爲水之度其盈過丈則洩皆通古河以入于海上制其源下放其流既節且宣用平水道初議者欲葉渠弗治而由河沁及海以漕又欲出京軍疏河有貞因奏蠲瀕河民馬牧庸役專力河防以省軍費紓民力工部請如有貞言不中制以是得成功是役也聚而間役者四萬五千人分而常役者萬三千人用水大小十萬竹倍之鐵斤千有二萬錠三千組八百金二千八百麻百萬斤荆倍之藁秸又倍之而用石若土

不可筭然用糧于官僅五萬石爲日五百五十有五君子曰元武之才徵有是役也白渠旣而不漕鄭渠漕而不貢工皆累年費萬萬計瓠子不溉不漕又不以貢役勞人至動萬乘獻璧馬願神視張秋輕重難易何如也

命副都御史馬昂總督兩廣軍務兼理巡撫○詔兀良哈貢使限二三人入京

守臣一言兀良哈貢使往來不絕爲瓦剌間諜故有是詔

冬十月皇太子見濟卒謚懷獻葬西山○陞王竑爲副都御史仍巡撫督漕理鹽

竝在淮上有巡河御史王珉貪淫疏劾之謫珉戍開平  
連歲災傷竝復上疏言山東河南東昌開封抵江北徐  
淮去年正月大雪異常夏秋雨水人民廬舍漂蕩麥稻  
湮沒老稚顛連流徙邇者新春風雨連月寒沍倍冬不  
識天意何在嘗觀易泰卦彖曰內陽外陰君子道長小  
人道消否卦彖曰內陰外陽小人道長君子道消蓋陽  
爲君子陰爲小人今方春陽長其候類秋冬是陰盛陽  
微殆食祿者君子少而小人多故也然小人之行豈懦  
而無用鈍而不敏訥而無言愚戇而冒犯天怒者乎必  
其欺詐若誠敬便佞若忠鯁大貪若廉大姦若愚卽書  
所謂靜言庸違孔子所謂色厲內荏者是也伏望皇上



念祖宗社稷之重上天咎徵之戒責有位之臣痛自修省改圖進君子退小人俾忠良者任政姦邪者屏處又必省刑罰而止聚斂節財用而抑貢獻罷無益之工嚴無功之賞散財以收民心愛民以植邦本庶幾人事修而天變可回然欲知君子小人邪正又必本於聖德之明庵伏望皇上日親講臣俾陳二帝三王與祖宗列聖養心修德之要以清出治之源則凡君子小人莫逃天鑑矣臣濫處臺憲致茲災異無所逃罪伏乞罷歸田里上嘉納引咎勅諸大臣修省被災郡邑賑濟竑又上疏言飢民流徙就食臣分遣屬吏沿河贍賑每遇過舟董令出米爲粥分給賴存活者一百八十五萬八千五百

人勸諭富有方家。出水麥穀粟二十五萬七千三百石。銀三千六百七十兩錢。綿布半之量。給被災者。五十五萬七千四百七十九家。缺農具種子。七萬四千三百九十七家。亦以官物賑給。民流去。撫來復業者。五千五百九十三家。他境流冗安輯者。萬六百餘家。幸賴聖明。盜賊稀少。顧鴻鴈之哀鳴。方息。鷦鷯之棲輯。未寧。更藉休養。庶底康寧。

甲戌五年春正月上。皇在南宮。○二月詔求直言。

是時自冬徂春。雨暘弗順。或積雪連旬。或窮陰彌月。春分已過。暖氣尚遙。乃下詔修省。令内外文武大小群僚。直言無隱。

三月賜進士孫賢等三百五十人及第出身有差○夏四月朔日有食之○新建隆福寺成

車駕擇日臨幸有司已夙駕除道太學生楊浩等上疏言陛下卽位之初首幸太學海內之士聞風快覩今又棄儒術而重佛教豈有聖明之主事夷狄之鬼而可垂範後世者耶儀制卽中章綸亦言佛者夷狄之法非聖人之道以萬乘之尊臨非聖之地史官書之傳之萬世實累聖德帝覽疏卽日罷行時又有太學生西安姚顥言王振竭生民膏血修大隆興寺極爲壯麗車駕不時臨幸夫佛本夷狄之人信之得禍若梁武帝者足爲前車之鑒請自今凡內臣修蓋寺院悉行拆毀以備倉廩

之用勿復興作萬世之法也時不能用自正統至天順  
京城內外建寺二百餘區大臣諫官不言而一生言之  
一時名震中外

南京大理少卿瘳莊應詔上疏不報

莊以庶吉士給事中陞大理寺丞再陞南京大理少卿  
時值災異下詔求言莊上疏仰惟上皇被留虜廷皇上  
撫有萬方屢降詔書以大兄皇帝鑾輿未復虜讐未報  
爲意皇上之心卽堯親九族舜徵五典之心也賴刻勵  
神靈皇上勝筭迎歸上皇於南宮臣遠臣未知皇上于  
萬幾之暇曾時朝見以叙天倫之樂敦友愛之情否也  
臣自爲翰林庶吉士刑科給事中大理寺丞時伏覲上

皇卽位之初遣太師英國公張輔吏部尚書郭璉爲正副使冊封皇上奄有大國每遇正且冬至令群臣見皇上於東廡百官感上皇兄弟友愛如此天下其有不治乎今幸上皇迎歸伏望爲親親之恩萬幾之暇時時朝見上皇于南宮或講明家法或商確治道仍令群臣時令亦得朝見以慰上皇之心如此則孝弟刑於國家恩義通於神明災可弭而祥可召矣然所係之重又不特此太子者天下之本臣愚竊以爲上皇諸子皇上之猶子也宜令親近儒臣誦讀經書以待皇嗣之生使天下臣民曉然知皇上有公天下之心蓋天下者太祖太宗之天下仁宗宣宗之繼體守成者此天下也上皇之北

征亦爲此天下也。今皇上撫而有之，必能念祖宗創業之艱難，思所以係屬天下之心矣。近年日食星變地震，且阻山崩水溢，災異叠見，非止霜雪不時而已。臣切憂心，以爲弭災召祥之道，莫過於此。詞意悲懇，留中不報。

五月下監察御史鐘同禮部郎中章綸于錦衣獄。黃霧四塞。

監察御史鍾同方易儲時，每獨坐深思泣下。已而懷獻太子卒，人心危懼。同諷禮部請復立沂王爲東宮。禮部大臣縮首咋舌曰：「作然同遂上疏，請立沂王以固宗社。」并陳時政闕失，疏入，縛下詔獄，械繫極苦，杖之不死。仍

禁獄中。章綸發憤亦卽具疏陳修德弭災等事。曰臣聞天下之本在國國之本在家家之本在身身之本在心大學曰心正而後身修以身爲天下國家之本而心又一身之本也天下安危係于人君一身身安則天下安天下治亂出于人君之一心心正則天下正欲安天下必先安身欲正天下必先正心此二者當急之務也臣恭惟皇上身乃天地宗廟社稷之所付託天下華夷臣民之所仰望祖宗列聖萬年之基業在是聖子神孫萬世之統緒在是誠不可不保養而所以保養之者莫切于遠聲色也昔唐太宗納仁基女魏徵諫止之憲宗時教坊使稱密詔選良家女子納禁中李絳上疏乃悉還

之文宗取李教女入宮魏譽諫而出之此古之忠臣愛  
君必拂其邪心防其嗜慾置君于無過之地正心以爲  
安天下國家之本使天下莫得非議也伏望皇上思天  
地宗社付託之重念天下臣民仰望之深宵旰憂勤日  
夕惕勵以安天下而於深宮之內遠美色遠聲樂以保  
養聖躬誠以帝王一動一靜天鑒臨之天下知之史官  
書之以昭示天下以鑒戒後世不可得而掩也臣又聞  
堯舜禹啟成湯太甲盤庚高宗文武成康宣王之爲君  
皐皞稷契伊尹仲虺甘盤傳說周召仲山甫尹吉甫之  
爲臣或都兪吁咈而規戒于朝廷之上或謨明弼諧而  
陳論於堂陛之間或君告臣而曰予違汝弼毋面從或



臣戒君而曰罔遊于逸罔淫于樂上下之間更相告戒故能贊襄治化而致雍熙太和之盛我朝祖宗列聖之於諸臣嘗命左右以備顧問或於大誥首著君臣同遊之篇或於勅諭而有旁招俊乂之語伏望皇上以歷代帝王及祖宗列聖爲法每退朝之後許師保尚書諸大臣及六科十三道五品以上更番於便殿以備顧問各條荅事宜必言救時急務如此則足以明四目達四聰而於民間利病無不周知矣昔者伊尹告太甲曰立愛惟親立敬惟長始於邦家終於四海孟軻氏有曰堯舜之道孝弟而已矣誠以孝弟者百行之本萬善之源天子之所以德教加于百姓刑于四海不越是而已矣故

大舜父頑母嚚克諧以孝周文王事王季一日三朝漢  
高祖五日一朝太公文帝侍薄太后疾目不交睫衣不  
解帶是孝之可法者如此唐玄宗初卽位爲長枕大被  
與兄弟同寢殿中或設五帳與諸王更處其中或置花  
華樓召諸王同宴是友愛之可法如此臣伏望皇上於  
退朝之暇必朝兩宮尊奉上聖皇太后皇太后而修問  
安視膳之禮是卽虞舜周文漢高文帝之孝也臣恭惟  
太上皇帝君臨天下十四年是爲天下之父也與皇上  
同氣異胞是爲至親之兄也皇上曾親受上皇之冊封  
是爲上皇之臣子也上皇親征戎虜被留虜庭嘗詔旨  
傳位於陛下是以天下授陛下也陛下尊之爲太上皇

帝是爲天下之至尊幸而奉迎還宮。是皇上之至願亦天下之至望也。上皇爲陛下同氣之親兄。陛下爲上皇同氣之親弟。形雖爲二其實一人。况上皇天性謙冲。意無彼此。伏望皇上於朔望日。或節旦。幸南宮率群臣朝見上皇於延安門。以叙連枝同氣之情。以極尊隆崇奉之道。則國家天下之福萬世帝王之法也。臣又竊觀北極五星明大則吉。以臣觀之。是復中官之象而位不虛也。誠以后妃之德風之始也。所以風天下而王夫婦也。今茲詔冊妃汪氏爲皇后。以厚大倫之原。是以正位中宮而孝敬勤儉之德已聞於中外矣。又詣冊立世子母杭氏爲皇后。是固所以正大禮明彝倫而中宮之位。又

議而弗居也不意世子薨逝臣民莫不痛心此事既往  
固不必言矣然而中宮之位不可以久虛伏望皇上後  
后汪氏於正宮則皇子大本不期而有六宮儀範不期  
而正國家之本風化之原自可表正四方流傳萬世矣  
至於皇上推念同氣猶子之義詔沂王復居儲位以候  
皇子之生如此則五倫全備而和氣充溢於宮庭萬姓  
愛戴而歡聲洋溢於四海殆見天心自回災而劫虜有  
不足平者矣尚有辨異端等事語皆激切上大怒下綸  
詔獄炮烙煅煉逼綸引大臣及通南城狀體無完膚竟  
不承以鍾同先嘗上言并欲殺二人會天大風雨雷霧  
四塞乃止

請給事中徐正戍鐵嶺衛

徐正請召見便殿屏左右言今日臣民有望上皇復位者有望廢太子沂王嗣位者陛下不可不慮爰出沂王於所封沂州增高南城數尺伐去邊城高樹宮門之鎖亦空灌鐵帝怒謫戍鐵嶺衛

出兵部觀政進士楊集爲安州知州

楊集以鍾同章綸二人下獄上書于謙略曰姦人勸黨進易儲之說以迎合上意本爲脫身計耳公等國家柱石乃戀官僚之賞而不思所以善後乎脫二人然杖下而公坐享榮高奈清議何謙以書示王文文曰書生不知朝廷法度然有膽氣當進一級處之遂出爲安州知

州

齊庶人賢臧谷庶人斌炊移置南京勅守備大監參齊尚書防察之

賢臧博少子也尚幼谷庶人絕齊庶人因請得谷庶人第歲給食米二十石

六月加王文少保東閣大學士○秋七月初儒臣纂修宋元綱目○復命禮部纂修天下地理志太子太保兵部尚書儀銘卒○改李賢爲吏部侍郎

賢爲君監錄擇其中善可爲法者二十二君每君擇取最切要者三四事集爲錄上之奏言則代聖賢之君事跡浩漫難於徧覽今特錄堯舜而下二十二君每君擇

取所行之最善者數事集爲一帙臣於每段之後略爲解說數句欲陛下易於覽而行之兼此二十二君之善而有之則功德之隆真比於堯舜而光祖宗矣帝覽此䟽問中官王誠等曰此奏欲何爲誠對曰欲陛下學此數君耳乃領之

十二月調福建巡按御史練綱爲邠州判官卒

己亥六年春正月上皇在南宮○命太監班佑鎮守兩廣

兩廣鎮守

太監於此○調工部尚書石璞爲兵部尚書協理部事出

內閣江淵爲工部尚書○總督兩廣軍務副都御史馬昂  
破瀧水徭陞右都御史

行龍水徭賊趙音旺作亂合諸山叛徭等殺掠民罹

其害昂乃調廣西狼兵同官軍直抵徭巢斬獲甚衆。按瀧水羅徭徭賊自馬昂此年征後天順初業盛成化初韓雍復一再征之至今無復議征者。賊日益肆夫今邊臣猶議西復哈密北復大寧東勝河套今此瀧水羅徭一帶乃郡縣內地距德慶州治僅隔一江去梧州總府不百里爲兩廣往來咽喉奈何坐視其暴劫吾民阻截江面爲肘腋之患而不恤。緣江南岸數百里山林叢密不敢毀傷其一草一木朝廷設重鎮置兵衛果何用也。霍韜嘗謂羅徭綠水之賊爲害深矣而有司不肯議征非不能征不肯征也。若調狼兵達舍并官軍分爲數道一自鬱林入一自高州入一自新會入一自德慶瀧



水入四面並進而相州入兵上流扼之且縱火盡赭其  
林木使無所蔽伏羅徇綠水之賊反掌可平也嗚呼馬  
昂葉盛韓雍獨何人哉

逮南雄知府劉實下詔獄

實由宣德五年進士改庶吉士。乞教陞金華府同知以  
廉操直節著聲擢爲順天府治中。召修元史筆削任心  
無所咨承屈遜見他人書不合已意輒大笑聲徹陞閤  
問聞者驚愕。相戒勿以藁示。出爲南雄知府。南雄當嶺  
南孔道商稅巨萬。知南雄者輒益壓推其餘。餌過客得  
其權心。且爲游聲譽。實至存稅十一。繕郡學。補張九齡  
大庾嶺松不冝私一錢。未數月中貴使嶺外至南雄。廉

得重贖。不得。輒苛辱實。郡人擁實出。中貴去。至韶。韶人爲言。南雄守且驛奏中貴橫索賂。辱太守事。中貴懼。急傳馬馳奏實。抗勅使毀勅。大不敬。詔逮至京。下獄。獄中上書言臣蒙恩仕官三十年。不以妻子自隨。餐粗衣敝。欲爲國家愛養小民。不忍勞費。以是觸忤天使。無所逃罪。上不復更窮治。不數日。竟卒獄中。

夏四月朔日有食之。○六月以朱熹裔孫挺爲翰林院世五經博士。○秋八月杖南京大理少卿廖莊御史鍾同郎中章綸於闕庭。

時廖莊以母喪赴京。關領勘合。於八月十七早朝見上。忽念莊往年有疏。與鍾同章綸復儲疏相類。遂縛三人。

至午門前杖一百。莊謫定羌驛丞。同綸固禁獄中。同卒於獄。骸掩園土。莫敢收葬。

丙子七年春正月上皇在南宮。○二月以誠意伯劉基裔孫祿爲翰林院五經博士。○夏五月進陳循華蓋殿大學士。仍兼文淵閣高穀王文並謹身殿大學士。仍兼東閣。穀進少保。蕭鎡戶部尚書。商輅兼太常卿。倪謙呂源左右春坊大學士。○以宋周惇頤裔孫冕爲翰林院五經博士。○秋八月徐有貞陞副都御史還朝。

帝用人多密訪於于謙。時缺祭酒。翰林徐有貞屬意補之。以門生楊宜爲謙內姻。託爲懇請。謙曲意從之。因中官以達於上。上宣謙至文華殿。辟左右諭之曰。徐有貞

雖有詞華。此人存心姦邪。豈堪爲祭酒。若從汝用之。將使後生秀才。皆被教壞了。心術謙無所對。惟叩頭謝過。及退。汗出浹背。有貞竟不之知。自是啣謙。

覆試順天中式舉人

是年鄉試。春坊大學士劉儼侍講學士黃諫爲考試官。時內閣陳循子瑛。王文子倫。入試俱不中選。循等遂劾奏儼諫二人閱卷不公。請如洪武間罪劉三吾等例。重開科考試。有旨令翰林院覆閱取中試卷。高穀惧儼等禍不測。欲爲申救。早朝奏事畢。出班跪稱。少保臣高穀有事聞上。因召至榻前。具白真情。且曰。大臣子與寒士並進。已不可。况又不安於命。欲構考官可乎。由是儼等

得釋特旨欽賜瑛倫舉人許赴會試。一時異之。禮科給事中張寧疏切照陳循王文職居輔弼任重經綸所當正已爲人爲上爲下而乃以子之故紛章叠奏煩責聰明祇爲私謀不恤國體大臣之道果安在乎臣聞宋范質爲相從子昇求遷秩質作詩戒之曰爾曹當閔我勿使增罪累比之陳循賢否何如也韓億爲相其子雖舉進士不就廷試兼以父任執政爲避比之王文高下何如也沈文通登進士第一馮京第二時以貴胄不可先寒酸乃進京而退文通比今試卷已落而求與中卷比對者得失何如也世之庸人愚婦亦知父不談子之德豈有身爲大臣公然爲其子暴才稱屈於朝廷之上哉

卽使才而屈猶不可也。况無實之爭。何以服天下。且今歲順天就試者一千八百餘名。而中式者僅一百三十五名。劉儼等假使考試未精。則其間遺漏者亦未止王倫陳瑛而已。若一槩援例求進。拒之則情偏。從之則弊起。是陳循等一舉而壞科目之制矣。臣聞樹德務滋。除惡務本。用法不可太寬。太寬則犯之者可倖免而不知懼。施恩不可過當。過當則得之者以爲易而不知感。循等假公濟私。要君挾下。罪狀已彰。人心共怒。若又待之以寬。施之以恩。而不絕其根柢。則循等愈無忌憚矣。乞正其罪。罷歸田里。王倫陳瑛仍照不中。發回原籍讀書。不報。

九月湖南苗叛。命兵部尚書石璞討之。○冬十二月削寧王護衛。

時僉都御史韓雍巡撫江西。劾王不法。并論府僚。上遣大臣卽訊奪王護衛罪。諸官僚

丁丑八年春正月上不豫。丙子百官請立東宮。不許。壬午上皇復卽皇帝位。

上有疾。免百官朝數日。圖富貴者因起異意。大學士王文與太監王誠謀欲取襄王世子。立爲東宮。其事漸泄。十有一日。左都御史蕭維禎率十三道同百官問安於左順門外。太監興安自內出曰。若皆朝廷大臣耳。目不能爲社稷計。徒問安耳。卽日維禎集十三道御史議曰。

今日興安之言。若皆達其意否。衆曰。皇儲一立。無他患矣。衆還道中作封事。草其略曰。聖躬不寧。內外憂懼。京民震恐。蓋爲皇儲未立。以致如此。伏望皇上早建元良。正位東宮。以鎮人心。會稿於朝。衆謂上皇子宜復立。惟王文意不在此。陳循輩知文意不言。李賢問學士蕭鎡。鎡曰。旣還不可再。文遂謂衆曰。今只請立東宮。安知朝廷之意在誰。繼禎因舉筆曰。我更一字。乃更早建爲早擇。笑曰。吾帶亦欲更也。是日進奏十有三日。奉聖旨。朕這幾日偶染寒疾。是以不曾視朝。待正月十七早朝。請擇元良一節。難准。禮部尚書胡濙令辦事官報各衙門曰。請立東宮事。今本部會閣下。及文武大小群臣於十



七日待上視朝。合辭懇請。令來報知僉名。遂會議於禮部草奏其略曰。天下者太祖太宗之天下。傳之於宣宗陛下。宣宗之子。沂王宣宗之孫。以祖父之天下。傳之於孫。此萬古不易之常法。稿登正本會僉。因姓氏衆字書多訛。至十六日。哺時方完。擬明日對仗陳進。上之有疾也。武清侯石亨知上疾必不起。若請復立東宮。不如就請太上皇復位。可得功賞。遂與都督張軌。太監曹吉祥。以南城復辟謀。扣太常許彬。彬曰。此社稷功也。雖然。彬老矣。無能爲也。盡圖之。徐元玉。亨。軌等從其言。徐有貞亦時常往返石亨家。人人莫知其故。是月十四日夜。亨等會有貞。有貞曰。太上皇帝昔者出狩。非以遊畋爲赤。

子故耳。今天下無離心。謀必在此時。不知南城知此意否。軌等曰。兩日前有陰達者。軌等去。兩日夜再會有。言南城已審報矣。計將安施。有貞乃升屋。躡步乾象。下言。時在今夕。不可失。遂相與密語。軌遽佯言。聞虜騎且薄都城。奈何。有貞言。當以兵入內。備非常。亨等駕說王文于謙。已矯取金牌勅符。迎襄王世子去矣。又曰。上命內官張永等。補亨數人。掌兵者矣。吉祥遂以入。白皇太后。卽下懿旨。言天子疾大漸。殆弗興。天位久虛。上皇居南內。于今八年。聖德無虧。天意有在。以奸臣擅謀。閔而不聞。欲迎立藩王。以承大統。將不利於國家。亨等其率兵以迎吉祥。卽收諸門鑰。夜四鼓。開長安門。軌親亨

有貞楊善等。納兵近千人。宿衛官軍驚愕。不知所爲。有出入者。兵輒叱止之。時天色晦冥。軌等惶惑。有貞趣行。大言時至矣。勿退。薄南宮城門。鐵錮牢密。扣不應。有貞命取巨木架懸之。數十人舉撞城門。又令勇士踰垣入。與外兵合毀垣。垣壞。門啟。軌等入見。太上皇燭下獨出。問曰。爾等何爲。衆俯伏合聲請陛下登位。乃呼兵士舉。舉來。兵士驚惧不能舉。有貞等助挽以前。掖上皇登舉。有貞等又自挽以行。忽天色昭朗。星月輝光。有貞等前導密邇屬車。至奉天殿。侍衛都督范廣禦之。戰。久闕下。時大小群臣。以景帝有十七早朝之旨。方各趨朝。謹待上出。期進會本。忽聞傳呼震地。群臣失色。須臾鍾鼓鳴。

上皇御極矣於是百官入賀朝野歡騰以爲復見太平  
會本遂不進